



Les douze sont élus de Iesus qu'il appelle Apostres ; puis guarit plusieurs malades venus à luy de toutes parts.

LES V S ayant prié toute la nuit au desert, & ayant remontré à ses Disciples, qu'il estoit venu au monde pour Euangeliser ; & enseignant aux Sinagogues, il appella à soy ceux qu'il voulut, afin qu'il les enuoyast prescher, & qu'ils eussent la puissance de guarir les malades, & chasser les Diabes : il en esleut douze, lesquels il appella Apostres, à sçauoir Simon Pierre, André son frere, Iacques & Iean, fils de Zebedée, Barthelemy, Philippes, Matthieu, Thomas, Iacques fils d'Alphée, & Iude frere de Iacques, autrement dit Thadée, & Simon, & Iudas Iscariot, qui fut traistre. Or descendant avec eux, il s'arresta en vn lieu champestre avec grande multitude de peuple de toutes nations, à sçauoir de Iudée, de Ierusalem, de Tyr & Sidon contrée maritime, lesquels estoient venus pour l'ouïr, & pour estre guaris de leurs maladies : & ceux qui estoient tourmentez des esprits immundes furent guaris, & toute la multitude taschoit à le toucher ; car vne vertu sortoit de luy, & les guarissoit tous.

S. Matthieu Chap. 10. S. Marc Chap. 3. S. Luc Chap. 7.